

§ 36-mi imm. 2 naapertorlugu Naalakkersuisunut uku apeqputigineqarput:

- **Imigassat aalakoornartortallit nunatsinni pisiniarfinni ulluinnarni sapaatip akunnerisalu naanerini tuniniarneqartarnerisa sivisunerusumik ingerlanneqartarsinnaanerit Naalakkersuisut qanoq isumaqarfigaat?**
- **Imerniartarfinni aalakoornartulinnik tuniniaasarnerup sivisunerusumik ingerlasalernissaa pilersaarutigineqarpa?**
- **Aalakoortut pisiniarfinni imigassanik aalakoornartulinnik pisitinneqartarnerat aammalu inuusuttuaqqat 18-niliisimanngitsut pisitinneqartarnerat pillugu Naalakkersuisut inatsimmik nr. 11, 11 November 2000-imeersumik sukateriniarpat?**

(Inatsisartunut ilaasortaq Kristian Jeremiassen, Siumut)

Akissuteqaat

(Peqqissutsimut Naalakkersuisoq, Agathe Fontain)

Naalakkersuisut apeqputigineqartut qujassutigaa.

Ukiut arlalialussuit ingerlaneranni innuttaasut agguaqatigiissillugu imigassanik aalakoornartulinnik atuinerat annikillisinneqarsinnaasimavoq. Imigassanik aalakoornartulinnik akusaanngitsunik ukiumut eqqussuineq inunnut 14-it sinnerlugit ukiulinnut ukiuni 2001-imiit 2008-mut 12,59 literiniit 10,55 literinut appararsimavoq. Imigassanik aalakoornartulinnik ukiumut eqqussuineq ukiumut atuinnermut naapertuutivissutut isigineqarpoq.

Naalakkersuisut imigassanik aalakoornartulinnik imertarnerup apparartornera pitsaasutut isigaat, kissaatigalugulu innuttaasut imigassanik atuinerisa ilorraap tungaanut allanngoriartornera ingerlaannassasoq. Taamatut isumaqarput meeqqanik sumiginnaanerpasuit imigassartortarnerullu inuuniarnermut peqqissutsimullu pitsaanngitsunik kingunerisartagai pissutigalugit.

Naalakkersuisut imigassanik aalakoornartulinnik pisiniarfinni imerniartarfinniluunniit tuniniaanermi sassaallertarnermilu ammasarfinnik maannakkut allanngortitsilersaanngillat.

Inunnut aalakoortunut inuusuttunullu 18-it inorlugit ukiulinnut imigassanik aalakoornartulinnik pisititsisoqartarneranut tunngatillugu apeqqummut oqaatigineqassaaq:

Akuersissummik pigisaqartup imaluunniit tuniniaasusup sassaallertuusulluunniit akisussaaffigaa qulakkiissallugit

- aalakoortunut imigassanik aalakoornartulinnik pisititsisoqannginnissaa sassaallertoqannginnissaaluunniit, aamma
- inuusuttunut 18-it inorlugit ukiulinnut pisititsisoqannginnissaa, inuup 18-inik ukioqalereersimanissaanut pisariaqartinneqartumik uppersaasiisoqarnissaanik piunasaqarnermigut.

Ullumikkut periarfissaqarpoq aalakoortunut inuusuttunullu 18-it inorlugit ukiulinnut tuniniaasarneq sassaallertarnerlu pillugit inatsimmi aalajangersakkanik unioqutitsisoqartillugu akiliisussanngortitsisoqarnissaanut. Naalackersuisut isumaqarput aalakoortunut inuusuttunullu 18-it inorlugit ukiulinnut imigassanik aalakoornartulinnik tuniniaasarnermut sassaallertarnermullu tunngatillugu inatsisinik sukaterisoqarnissaa maannakkuugallartoq pisariaqartinneqanngitsoq.

Naalackersuisut erseqqissassavaat innuttaasut aalakoortunut inuusuttunullu 18-it inorlugit ukiulinnut tuniniaasoqarneranik malugisaqartut pisut politiinut nalunaarutigisariaqarmatigik.